

განმარტებითი ბარათი

„პარლამენტის წევრის სიცოცხლისა და ჯანმრთელობის სავალდებულო დაზღვევის შესახებ“ საქართველოს კანონში ცვლილებებისა და დამატებების შეტანის თაობაზე“

ა) ზოგადი ინფორმაცია კანონპროექტის შესახებ:

ა.ა) კანონპროექტის მიღების მიზეზი

კანონის მომზადების მიზეზია „ჯანმრთელობის დაცვის შესახებ“ საქართველოს კანონში განსახორციელებელი ცვლილებები. კერძოდ, „ჯანმრთელობის დაცვის შესახებ“ კანონპროექტის მიხედვით, მოსახლეობის გარკვეული მიზნობრივი ჯგუფებისათვის სამედიცინო მომსახურების გაუმჯობესების მიზნით, სამედიცინო მომსახურების მიწოდება უზრუნველყოფილი იქნება სადაზღვეო ვაუჩერის გზით.

აღნიშნული პრინციპები ასხული უნდა იქნეს „პარლამენტის წევრის სიცოცხლისა და ჯანმრთელობის სავალდებულო დაზღვევის შესახებ“ საქართველოს კანონზეც, პარლამენტის წევრთა სიცოცხლისა და ჯანმრთელობის დაზღვევის გაუმჯობესებისა და მათთვის სადაზღვეო ორგანიზაციის საკუთარი ინიციატივით შერჩევის უფლებამოსილების მინიჭების მიზნით.

ა.ბ) კანონპროექტის მიზანი

კანონპროექტის მიზანია საქართველოს პარლამენტის წევრისათვის სამედიცინო მომსახურების მიწოდების გაუმჯობესება, მათთვის სამედიცინო მომსახურების მიმწოდებელი სადაზღვეო კომპანიის საკუთარი სურვილისამებრ შერჩევით გზით.

კანონპროექტი მიზნად ისახავს, რომ საქართველოს პარლამენტის წევრისათვის სახელმწიფო დაფინანსებით, სამედიცინო მომსახურების მიწოდება განხორციელდეს სადაზღვეო ვაუჩერის საშუალებით. როდესაც, დაზღვეული თავად ირჩევს სადაზღვეო ორგანიზაციას, სადაც წარადგენს სახელმწიფოს მიერ

მისთვის საკუთრებაში გადაცემულ გარკვეული მოცულობისა და ღირებულების ვაუჩერს და სადაზღვეო ორგანიზაციისაგან იღებს სადაზღვეო პოლისს. თავის მხრივ, სადაზღვეო ორგანიზაცია თავად აწარმოებს ანაგარიშსწორებას ერთის მხრივ, სამედიცინო მომსახურების მიმწოდებელთან, მეორეს მხრივ, კი სახელმწიფოსთან.

ლაფინანსების აღნიშნული მიმართულების მიზანს წარმოადგენს პარლამენტარისათვის – სადაზღვეო ვაუჩერით მესაკუთრისათვის, თავისუფალი არჩევანის მიცემის შესაძლებლობა, რათა მან თავად განსაზღვროს მისთვის ხელსაყრელი სადაზღვეო კომპანია, სადაც მოახდენს სახელმწიფოს მიერ გადაცემული ფასიანი ინსტრუმენტით – ვაუჩერით სარგებლობას.

ა.გ) კანონპროექტის ძირითადი არსი

კანონპროექტის პირველი მუხლის პირველი პუნქტის მიხედვით, ახალი რედაქციით ყალიბდება კანონის მე-4 მუხლი, სადაც ახლებურად ისაზღვევება დამზღვევის ცნება, კერძოდ, ამ შემთხვევაში, დამზღვევს წარმოადგენ არა საქართველოს პარლამენტი, არამედ, თავად პარლამენტარი, რომელიც იმავდროულად არის დაზღვეულიც და რომელიც სახელმწიფოს მიერ მისთვის საკუთრებაში გადაცემული ვაუჩერის ფარგლებში, თავისი შეხედულებისამებრ, ირჩევს სადაზღვეო ორგანიზაციას, რომელთანაც აფორმებს სადაზღვეო ხელშეკრულებას.

კანონპროექტის მიხედვით, პარლამენტის წევრის სიცოცხლისა და ჯანმრთელობის სავალდებულო დაზღვევა ხორციელდება ვაუჩერის გზით, რომლის პირობებსა და გაცემის წესს ადგენს საქართველოს პარლამენტის ბიურო, „ჯანმრთელობის დაცვის შესახებ“ საქართველოს კანონისა და ამ კანონის საფუძველზე.

კანონპროექტის პირველი მუხლის მე-2, მე-3 და მე-4 პუნქტებით კანონიდან ამოღებული იქნა ის პუნქტები, რომლებიც ითვალისწინებენ ხელშეკრულების დადებას მზღვევლსა და საქართველოს პარლამენტს შორის, იმ გარემოებიდან გამომდინარე, რომ ცვლილების საფუძველზე დაზღვევის ხელშეკრულების გაფორმება მოხდება უშუალოდ სადაზღვეო ორგანიზაციასა და საქართველოს პარლამენტის წევრს შორის.

ბ) კანონის პროექტის ფინანსური დასაბუთება

ბ.ა) კანონის პროექტის მიღებასთან დაკავშირებით აუცილებელი ხარჯების დაფინანსების წყარო

კანონპროექტის მიღება არ მოითხოვს ბიუჯეტიდან დამატებით ფინანსურ ხარჯებს, რამდენადაც აღნიშნული ცვლილებით ზუსტდება მიმდინარე წლის ბიუჯეტით სამინისტროსათვის გამოყოფილ ასიგნებათა ფარგლებში.

ბ.ბ) კანონის პროექტის გავლენა ბიუჯეტის საშემოსავლო ნაწილზე

კანონის პროექტის მიღება გავლენას არ იქონიებს საშემოსავლო ნაწილზე

ბ.გ) კანონის პროექტის გავლენა ბიუჯეტის ხარჯვით ნაწილზე

კანონის პროექტი გავლენას არ იქონიებს ბიუჯეტის ხარჯვით ნაწილზე, რამდენადაც აღნიშნული ცვლილება დაკავშირებული არ არის საბიუჯეტო სახსრების ოდენობის ცვლილებასთან.

ბ.დ) სახელმწიფოს ახალი ფინანსური ვალდებულებები

კანონის პროექტის მიღება არ გამოიწვევს სახელმწიფოსათვის ახალი ფინანსური ვალდებულებების წარმოქმნას.

ბ.ე) კანონის პროექტის მოსალოდნელი ფინანსური შედეგები იმ პირთათვის რომელთა მიმართაც ვრცელდება კანონპროექტის მოქმედება

კანონპროექტი არ გამოიწვევს ფინანსურ შედეგებს იმ პირებისათვის, რომლებზედაც ვრცელდება მისი მოქმედება.

ბ.ვ) კანონის პროექტით დადგენილი გადასახადის, მოსაკრებელი ან სხვა სახის გადასახდელი ოდენობის განსაზღვრის წესი (პრინციპი)

კანონპროექტით არ დგინდება გადასახადის, მოსაკრებელი ან სხვა სახის გადასახდელის ოდენობის განსაზღვრისა და დადგენის წესი.

გ) კანონის პროექტის მიმართება საერთაშორისო სამართლებრივ სტანდარტებთან

გ.ა) კანონის პროექტის მიმართება ევროკავშირის დირექტივებთან

კანონის პროექტი არ ეწინააღმდეგება ევროკავშირის დირექტივებს

გ.ბ) კანონის პროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან

კანონის პროექტის მიღება არ ეწინააღმდეგება საქართველოს მიერ საერთაშორისო ორგანიზაციებში წევრობასთან დაკავშირებით აღებულ ვალდებულებებს.

გ.გ) კანონის პროექტის მიმართება საქართველოს ორმხრივ და მრავალმხრივ ხელშეკრულებებთან

კანონის პროექტის მიღება არ არღვევს და არ ეწინააღმდეგება საქართველოს მიერ დადებულ ორმხრივ და მრავალმხრივი საერთაშორისო ხელშეკრულებებით ნაკისრ ვალდებულებებს.

დ) კანონის პროექტის მომზადების პროცესში მიღებული კონსულტაციები:

დ.ა) არასახელმწიფო ან/და საერთაშორისო ორგანიზაცია/ დაწესებულება, ექსპერტები, რომლებმაც მონაწილეობა მიიღეს კანონის პროექტის შემუშავებაში, ასეთის არსებობის შემთხვევაში

კანონის პროექტი არ ყოფილა წარდგენილი ექსპერტებისათვის.

დ.ბ) კანონის პროექტის შემუშავებაში მონაწილე ორგანიზაციის(დაწესებულების) ან/და ექსპერტის შეფასება კანონპროექტის მიმართ

კანონპროექტი შემუშავებაში არ მიუღიათ მონაწილეობა ორგანიზაციებსა და დაწესებულებებს.

დ.გ) კანონის პროექტის ავტორი

კანონპროექტის ავტორია საქართველოს შრომის, ჯანმრთელობისა და სოციალური დაცვის სამინისტრო.

დ.დ) კანონის პროექტის ინიციატორი

კანონის პროექტის ინიციატორია საქართველოს მთავრობა.